



*Jumat, 20 Desember 2024*  
**Ogen: Kuan-kuanen 17:17**



**Teman Si Encidahken Ate Keleng**



**N**anamna pertemanen tergejap kal adi i bas perantauan. Radu-radu nadingken kuta, radu-radu erjuang i bas kuta si ndauh. I bas perantauan e teman sada kuta e minter si akap kade-kadenta. Teman sada merga entaha sada suku ras kita minter si akap senina ras turangta. Mis si ikuti persadan merga si lima entah persadan anak kuta. Si bahan perjumpanta sekali sada bulan, mburo ate tedeh. Di kune lit acara kitik-kitik i rumahta, enggo teman sada persadan ndai i je ndungisa dahin e. Di kune kita sakit entah erceda ate, teman i bas perantauan e lebe ngarak-ngaraksa, ipepulung-pulung teman e duitna lako pertambarta, amin pe kari dungna igalari keluarga. Nggit ia erjaga i rumah entah i rumah sakit. Bagem nanamna teman e, tuhu-tuhu kita tersampat.

Tuhu, gundari kita pe i bas perantauan nge i doni enda. Labo doni enda inganta si tuhu-tuhu. Adi bage kita perlu teman, si encidahken atena keleng. Banci saja labo lit sima-simanta, la lit ndeher kade-kadenta, teman e me jadi seninanta. Adi kataken teman e jadi senina, i je lit sura-sura lako nampati. Lit jiwa nggit berkorban, nggit mere waktu, tenaga, materi lako nampati teman.

Nehken kekelengen e labo erperkiraan ras la ngarapken imbalan. Nggit kita mereken dukungan gelah ia maju ku lebe guna reh mehulina. Nggit kita mereken persinget gelah ula ia ndabuh ku bas kesalahaen si seri. Ertina bas pertemanen e turah kekelengen. Sura-suranta gelah tetap temanta e reh mehulina. Tokoh si jadi usihenta i bas erteman e me Jesus Kristus jine. Ia nggit mereken dareh ras kesahNa guna teman-temanNa.

